



Die Voortrekkers

Prospektus vir die HW/PV proses 2010

1. Inleiding

Die Hoofleierswag- of Presidentverkenner-toekennings word op nasionale vlak aan 'n senior Verkenner toegeken. Die toekenning word deur die Hoofdagbestuur aan suksesvolle kandidate gegee. 'n Kandidaat kan net een keer in sy Verkennerloopbaan vir die HW/PV proses inskryf.

Daar word tussen 'n Hoofleierswag en Presidentverkenner onderskei deur die volgende definisies:

Hoofleierswag:

'n Hoofleierswag is 'n Verkenner met 'n bewese betrokkenheid by Die Voortrekkers en met 'n goed deurdagte kennis van die kurrikulum van Die Voortrekkers.

Presidentverkenner:

'n Presidentverkenner is 'n Verkenner:

- wat in die keuses wat hy maak bewys lewer daarvan dat hy ABC-begronde is;
- wat sy beginsels wat hy aanhang en uitleef vanuit 'n Bybels-Christelike lewens- en wêreldbeskouing laat voortspruit;
- wie se gesag as leier aanvaar word;
- waarvan die vier fasette van sy menswees (verstand, gees, gevoel en liggaam) in balans is en wat groei toon in die ontwikkeling daarvan.

Indien swak of onverantwoordelike gedrag binne of buite Die Voortrekkers onder die aandag kom van Die Voortrekkers voordat 'n toekenning aan die kandidaat gemaak is, sal dit tot gevolg hê dat die kandidaat nie in aanmerking kom vir enige toekenning, Hoofleierswag of Presidentverkenner nie.

Die toekenningsproses behels die volgende stappe:

- 1.1 In die voorafevalueringsproses skryf die kommando of gebiedskamp die kandidaat in wat voldoen aan die vereistes vir die HW/PV proses. Die Gebiedsdagbestuur of sy gevolmagtigde verifieer of die kandidaat aan al die toelatingsvereistes voldoen.
- 1.2 Die kandidaat moet die teoretiese vraestel slaag. Deel 2 moet volledig beantwoord word.
- 1.3 Suksesvolle kandidate word deur die Hoofdagbestuur in samewerking met die betrokke Gebiedsdagbestuur na die HW/PV kamp genooi.
- 1.4 Die NK: Verkenner, in opdrag van Hoofdagbestuur, reël die HW/PV kamp waar kandidate geëvalueer word vir die Hoofleierswag- of Presidentverkenner-toekenning.
- 1.5 Suksesvolle kandidate ontvang hulle toekennings vanaf die Hoofdagbestuur op 'n prestige funksie soos gereël deur die betrokke Gebiedsdagbestuur.

2. Toelatingsvereistes

'n Kandidaat:

- 2.1 moet by die betrokke gebiedskantoor geregistreer wees;
- 2.2 se ledegeld moet vir die betrokke jaar betaal wees;
- 2.3 moet 'n senior Verkenner wees - nie noodwendig in sy akademiese matriekjaar nie. Indien 'n senior Verkenner wat nie in die betrokke jaar in graad 12 is nie, aan die proses wil deelneem, moet vooraf toestemming by sy Gebiedsdagbestuur verkry word;

- 2.4 moes die Volkstrotstaak teen nie later nie as 31 Oktober van die voorafgaande jaar by die betrokke gebiedskantoor ingehandig het (Vereistes op bladsy 121 en 122 in die Verkennerlewe);
- 2.5 moes minstens twee gebiedskampe gedurende sy Verkennerloopbaan bygewoon het. Gebiedskampe wat gedurende die Maart/Aprilvakansie van die jaar waarin die Verkenner aan die HW/PV kamp deelneem bygewoon word, kan ook in aanmerking geneem word;
- 2.6 moet deur sy kommando of 'n gebiedskamp, waar hy gedurende sy Verkennerloopbaan gekamp het, ingeskryf word;
- 2.7 moet minstens een jaar voor deelname aan die HW/PV kamp 'n Voortrekker wees;
- 2.8 moet drie getuigskrifte, onderskeidelik van die kerk, skool en kommando inhandig.

Om te kwalifiseer om uitgenooi te word na die HW/PV kamp moet die Verkenner die volgende minimumpunte in die onderskeie fases behaal:

- 30 in die vooraf evaluering en
- 50 in die teoretiese vraestel en
- 'n gesamentlike punt van 85 vir die vooraf evaluering en teoretiese vraestel.

3. Inskrywing

Die volgende voltooide dokumente moet voor die sluitingsdatum by die betrokke gebiedskantoor ingehandig wees:

- a. Volledig voltooide inskrywingsvorm
- b. Afskrifte van sertifikate vir alle punte waarvoor aansoek gedoen word by die vooraf evaluering
- c. Addisionele werkstuk (Opsioneel)
- d. Die getuigskrifte
- e. Die voorgeskrewe inskrywingsgeld van R100
- f. Die Volkstrotstaak (31 Oktober van vorige jaar)

Die gebiedsdagbestuur ken evalueringnummers vir die onderskeie gebiede soos volg toe:

Namibië	-	6xxx
Kaapland	-	7xxx
Vrystaat	-	8xxx
Transvaal	-	9xxx

4. Vooraf evaluering

Slegs die Verkenner se Verkennerloopbaan word in aanmerking geneem by die berekening van punte, behalwe diensjare wat oorgedra word van sy Penkop/Drawwertjieloopbaan.

Punte word verwerf vir die getal spesialisasies, gebiedskampe, jeugberade, diensjare en werksopdragte.

4.1 Puntetoekenning:

4.1.1 *Spesialisasies [maksimum 10 punte]*

1 - 7 spesialisasies:	2 punte
8 - 9 spesialisasies:	4 punte
10 - 11 spesialisasies:	6 punte
12 - 13 spesialisasies:	8 punte
14 spesialisasies:	9 punte
15 of meer spesialisasies:	10 punte

4.1.2 Gebiedskampe [maksimum 10 punte]

2 Gebiedskampe:	4 punte
3 Gebiedskampe:	6 punte
4 Gebiedskampe:	8 punte
5 Gebiedskampe:	10 punte

4.1.3 Jeugberaad [maksimum 4 punte]

1 Jeugberaad:	2 punte
2 Jeugberade:	4 punte

4.1.4 Diensjare [maksimum 15 punte]

1 - 2 diensjare:	3 punte
3 - 4 diensjare:	5 punte
5 - 6 diensjare:	7 punte
7 - 8 diensjare:	9 punte
9 - 10 diensjare:	11 punte
11 diensjare:	13 punte
12+ diensjare:	15 punte

(Die jaar waarin die Verkenner deelneem aan die proses, tel ook as diensjaar)

4.1.5 Werksopdragte [maksimum 16 punte]

Volkstrotstaak: Maksimum 10 punte

Die punte vir die Volkstrotstaak word as volg toegeken:

Voorkoms:	2 punte		
Inhoud van eerste deel:	4 punte	(Volgens	vereistes in
Verkennerlewe)			
Inhoud van tweede deel:	4 punte	(Volgens	vereistes in
Verkennerlewe)			

Dit gebeur toenemend dat kandidate doodeenvoudig lang gedeeltes van die take net so vanaf die internet kopieer. Dit kom neer op plagiaat en is nie toelaatbaar nie. Wanneer van die internet as bron gebruik gemaak word, moet dit net soos in die geval van 'n boek of tydskrifartikel in die bronnelys volledig aangedui word.

Addisionele werkstuk: Maksimum 6 punte

Die punte vir die addisionele werkstuk word as volg toegeken:

Inhandiging van taak:	2 punte
Voorkoms:	2 punte
Inhoud van die werkstuk:	2 punte

Die onderwerp van die addisionele werkstuk vir 2010 is "Wat verwag jy van 'n Verkenneroffisier?".

Die addisionele werkstuk moet 3 getikte bladsye (Arial 11 met 1.5 lynspasieëring en 2cm kantlyne) beslaan. Geen prente of foto's moet bygevoeg word nie.

Die vooraf evalueringpunte word bymekaar getel en bepaal die aantal bonuspunte wat vir die kandidaat oorgedra word na die HW/PV kamp. Dié punte word by die kandidaat se punte wat verwerf word op die HW/PV kamp, getel. Die bonuspunte word soos volg bepaal:

Voorafevalueringpunte	Bonuspunte
30 – 34	1
35 – 44	2
45 – 55	3

5. Teoretiese vraestel

Die Hoofdagbestuur neem verantwoordelikheid vir die opstel van die teoretiese vraestel.

Dit bestaan uit twee dele:

- 5.1 Deel 1 handel oor die inhoud van die Verkennerlewe.
- 5.2 Deel 2 bestaan uit opsteltipe vrae waarin die kandidaat aan die hand van situasies moet aandui watter optrede gevolg moet word sodat dit in ooreenstemming met die grondslag, wese, kode en doelstellings en die Verkennerbelofte is. Die deel handel oor die kandidaat se begroning [die uitleef van die kandidaat se ABC-waardestelsel] en moet voltooï wees om verder aan die HW/PV kamp deel te neem.

Die Hoofdagbestuur bepaal die datum waarop die teoretiese vraestel geskryf word. Die Nasionale Komitee Verkenners besorg die vraestelle aan die onderskeie gebiedskantore. Elke gebiedsdagbestuur reël sentrums waar die kandidate moet skryf. Elke gebiedsdagbestuur wys 'n verantwoordelike persoon vir elke eksamententrum aan. Die verantwoordelike persoon wys soveel toesighouers aan as wat nodig is. Die persoon besorg die antwoordstelsel direk na afloop van die eksamen aan die betrokke gebiedskantoor.

Die vraestel word nasionaal op dieselfde dag, datum en tyd geskryf – **Maandag 19 April 2010** om 18:00. Die Hoofdagbestuur kan 'n spesiale eksamen toestaan (in gevalle van siekte, dood of ander geldige onvoorsiene omstandighede). 'n Mediese sertifikaat of stawende dokument moet die aansoek vergesel. Hierdie aansoek moet binne 48 uur na die amptelike evalueringdatum deur die betrokke gebied aan die Adjunkhoofleier (Administrasie) gerig word. 'n Spesiale eksamen word slegs toegestaan wanneer 'n kandidaat nie die eerste eksamen afgelê het nie.

Kandidate met disleksie of soortgelyke gestremdheid:

Kandidate met een of ander gestremdheid waarvoor die skool addisionele tyd vir die beantwoording van teoretiese evaluering toelaat, moet reeds tydens aansoek tot die evalueringproses om addisionele tyd aansoek doen. So 'n aansoek moet vergesel wees van 'n sertifikaat van die betrokke skoolhoof waarin hy ook aandui hoeveel ekstra tyd normaalweg aan die kandidaat vir 'n soortgelyke teoretiese evaluering toegelaat word. In spesiale gevalle, wat deur die Gebiedsdagbestuur beoordeel word, kan kandidate vir 'n mondelinge teoretiese evaluering aansoek doen.

6. Nasien van die teoretiese vraestel

Die vraestelle en memorandum word aan die betrokke AGL: Verkennersake oorhandig. 'n Paneel merkers, soos aangewys deur die gebiedsdagbestuur, merk die vraestelle op 'n tyd en gesamentlike plek vooraf bepaal. Alle vraestelle word gemodereer. Indien 'n kandidaat 'n grensgeval is om deur te kom, word die vraestel *dadelik* gehermerk. Geen vraestelle sal dus in aanmerking geneem word vir hermerk nadat die uitslae van die vraestel bekend gemaak is nie.

'n Kandidaat moet ten minste 50% in die teoretiese vraestel verwerf om die vraestel te slaag en met die proses voort te gaan.

7. Die HW/PV kamp

- 7.1 Kandidate kwalifiseer vir die HW/PV kamp deur gesamentlik ten minste 85 uit 155 punte in die vooraf evaluering en teoretiese vraestel te verwerf.
- 7.2 Kandidate wat kwalifiseer word deur die Hoofdagbestuur na die HW/PV kamp uitgenooi. Die kamp word aangebied deur die Nasionale komitee: Verkennersake in opdrag van die Hoofdagbestuur.
- 7.3 Evalueerders en fasiliteerders word deur die Nasionale komitee: Verkennersake saamgestel.
- 7.4 Die program vir die HW/PV kamp bestaan uit:
 - a. Optrede deur sprekers ten opsigte van Afrikanerskap, Burgerskap en Christenskap
 - b. Kleingroepbesprekings en –evaluerings aangaande persoonlike leierskap
 - c. Individuele evalueringssessies aan die hand van Afrikanerskap, Burgerskap, Christenskap en Voortrekkerwees
 - d. Terugvoer aan kandidate
- 7.5 Tydens die individuele evaluering voer die kandidaat gesprek met die paneel. Die paneel staan onder leiding van die paneelleier wat in opdrag van die sameroeper van die betrokke evalueringspunt optree. Punte word direk na die gesprek met die kandidaat toegeken.
- 7.6 Vanweë die aard en samestelling van die HW/PV kamp is dit nie moontlik om die kamp te herhaal nie en kan daar dus nie geakkommodeer word vir siekte- of herevaluasie nie.

8. Aanwysing van Hoofleierswag

'n Kandidaat moet die HW/PV kamp volledig deurloop en minstens 50% behaal gedurende die Voortrekkerweestoetspunt om as Hoofleierswag te kwalifiseer.

9. Aanwysing van Presidentverkenner

Om as Presidentverkenner te kwalifiseer moet die kandidaat:

- die volledige HW/PV kamp deurloop en
- 'n gemiddeld van minstens 70% gedurende die kamp behaal en
- in nie meer as een toetspunt minder as 70% behaal nie.

10. Oorhandigingsfunksie

Elke Gebiedsdagbestuur reël 'n prestige oorhandigingsfunksie waartydens die sertifikate en kentekens aan die suksesvolle Hoofleierswagte en Presidentverkenners oorhandig word.

Baie dankie vir u vriendelike samewerking.



AHL Willem Petzer
Verkennersake